

Canticanan di Aruba den Concierto di Pasco na Barbados



ORANJESTAD(AAN)--

Michael e. Gill ta e Bibliotecario di e Campus di University of the West Indies na Barbados. Pero na mes momento e ta dirigente di e koor di e conocido Universidad Caribense.

Atrabez di Lourdes Croes di Biblioteca Nacional di Aruba, dos aña pasa el a drenta den contacto cu Maybeline Arends-Croes y entre otro a papia di e hecho, cu tur aña, pa nan concierto di Pasco, e Koor di e Universidad ta escohe dos cantica di islanan bisiña. Pesey e tabata interesa na haya dos cantica original di Pasco di Aruba tambe.

Maybeline Arends Croes a regala Gill su buki di cancionnan di Pasco y alabez a dune un cassette cu varios cantica original di Pasco di Aruba ariba.

E koor di Barbados a laga su vista cay ariba dos composicion Arubano: Llanto di un Mama cu letranan di Hubert Booi y musica di Maybeline Arends Croes y Nochi di Paz cu letranan di Hubert Booi y musica di Tica Giel.

Aña pasa nan a manda pidi un traduccion di e canticanan pa asina nan por comprende kico nan tabata canta pa publico na Barbados. Biblioteca Nacional pa medio di Lourdes Croes a percura pa traduccion di e dos canticanan, cu a keda presenta na publico na Barbados dia 9 di December ultimo.

Di e forma aki, e canticanan di Pasco di Aruba a resona den exterior, na un isla Caribense, caminda publico por a goza di e composicionnan na Papiamentu!